

Pashini coiteaperotachari oyaari quitaiteriqui
oca tsinane, iriotaque vatsatsi oyaari.

Iquempetaca ivatsa poshiniripee samani, quemari,
shintori, maniro, vaca, aisati vanquiyetachari
teapa, pato, tsamiri maaroni, aisati shimayeta-
tsiri.

Oca tsinane teerica oyaari ivatsa quemari,
shintori, maniro, vaca, jaocarica ijiiyetari
ainiroquerarica otsomontetiri ojananequite tempa
icantayetiro atiri eiro povaritsi, aitaque
iratsataqueri pijananequite.

Aririca poaqueari ivatsa jaocarica
ipajiiyetari poshiniriyetatsiri, aririca
intimavetaquea pijananequite ari iratsataqueri
ivoroqui. Ariorica povaqueari ivatsa poshiniripee
antearitatsiri, aitaque irantearitimotaquempi
pijananequite eiro ocantatsi intime.

Aitaque ocantari neantsi oquemavaquerica oca
tsinane icanteetaquerori otsaroanaque, irootaque
caari ovantayetari meeca oca tsinane irointi
oari shima, oari ivatsa aparopeeni tsimeri.
Impoiiji areetaca otimajanitanaque oca tsinane
quiteriveetanaque meeca. Antearo omaotaque.
Aisati iquempetaca ojananequite itimavetanaca
irinti matsari, te irishintsiteji cameetsa.

Tempa oyaacotaquero intime apitetanaintsine ojananequite, ojataque oquenquetsatacairi aavintantatsiri, ocantapaaqueri: -Oshequi notsaroi noayeteari ivatsa poshiniripee, tempa ari ivatsatanaqueri nojananequite ari irantearitanaque. Cameetsataque novari shima, impoiiji aparopeeni tsimeri.

Yacanaquero aavintantatsiri:

-¡Te tsinane! Ari ocantari iquenqueshireantari atiripee, meeca oshequi aneantacaro ari ayotero ocarati piquemiri icanteetimpiri avirori, te ari ocanteari, irootaque yametari acharineni. Intsite pineantearo poayeteari poshiniripee ari pineaquero avirori impoiiji pijananequite irishintsite cameetsa.

Oquemavaque meeca, oca tsinane ocoaque oneantearo ocarati icantaquerori aavintantatsiri. Ovacari maaroni icarati vanquiyetachari, ari oneaquero te onquiteriveeteji, te omacoteji aisati. Tecatsi avishimoterone itimanaque apitetanaintsiri ojananequite cameetsa itecatsiti.

Ari itimanaque jananequi, oca tsinane ovamen-
tsatiro cameetsa opishitaquero ovanco cajaraiteni
aamaacoventeari cameetsaquea itecatsite ojanane-
quite. Ariorica ototantearo imoito jananequi
aye tishira, tequerarica ototantearo oquivasanota-
vaquero, aisati oncotsitasanotavaquero. Tempa
iotanaque iroori aitaque ocanteari eiro ipatsaan-
tatsi aisati eiro aantaritsi pashini mantsiarentsi
icanteetiri tetano ovamayerine jananequi.

Aisati cameetsa ototantearo imoito jananequi
pashini timayetatsiri. Iro cantaincha otimatiye
onquivasanotavaquero aisati oncotsitasanotavaquero,
aisati ontaasanotavaquero paamariqui. Irootaque
coaperotachari eiro ototantarotsi ora oyecharipo-
roquitaintsiri aisati quipatsitatsiri.

Ariorica onquivaquero cotsirojaniqui, tishira
aisati pashinípee itotanteetarori imoito jananequi,
otimatiye aamaacoventearo oquipatsitanajicari
aisati, tequerarica ototantearo imoito jananequi.
Ariorica ajiricajero aisati quipatsitatsiri meeca
ari ontsirecapaaquearo imantsiarentsiste yora
jananequi.

Tempa aitaque timanaque yoca jananequi,
cameetsa ishintsiti, yoa cameetsa, yatsoti
ochochoquite iriniro, irosati yareetantacari
yoayetanacaro maaroni timayetatsiri yoayetari.
Iotantanacarori yoayetanacaro tempa timanaque
mava iyashirite. Intanacaro iriniro opaqueri
capichaji oja chochoqui. Iro cameetsatatsiri
iraca, mapocha, quemi, coricha, caniri, aisati
pashiniyetatsiri panquirentsi shiocatsiri
anampiqui.

Oca tsinane meeca iotaquero aisati,
ontimatiye oameteri ojananequite oacayaari
cameetsa. Ariorica ompaqueri iroyaari,
oneaqueririca irojocavaquero ontimatiye opanque-
nateari omperi irosati iriotantanaqueari iroyaa.
Ocantaveitea iriraavetaquearica, aikuero
ompatiyeri. Tempa iotaquero iroori ocarati
yoayetari opaqueriri irootaque irishintsitanta-
naqueari cameetsa, tempa iotaque aisati ari
irametanaquearo iroyaaro apaniro.
Tempa oca tsinane oshequi ioti, ¿tempa queario?

Meeca oca tsinane omayetaquero maaroni
ocarati icanteetaquerori jaoca ocanteari aparoni
tsinane timatsiri ojananequite. Oaca cameetsa
tequerani intimeni ojananequite. Impoiiji ari
itimanaque ojananequite oaca cameetsaquea
atsotayeri ojananequite irishintsitanteari,
impoiiji osamanitanaque iotanaque oacaayetari
caniri, coricha, machaaqui, chochoquiyetatsiri,
arooso, avena aisati vatsatsi. Aisati aamaaco-
ventacari cameetsa eiro imantsiatantatsi, ocaatiri
cameetsa inquitete, impoiiji aisati osataacaan-
taqueri vacuna.